

- Qualiter hinc veros formet titulos meus heros,
 Advena seu civis poterit cognoscere quivis.
 Stat Jovis inque casa Martis, quia bellica vasa
 90 Pulcre fortunat, Venerem sibi letus adunat.
 Lune crementum dat in hoc ipso documentum,
 Et bonus aspectus est Falcifer, unde profectus
 Sic isdem rebus sua jactans lumina Febus,
 Qualiter in palam celebrem suspenderis alam,
 95 Magnos rumores et claros signat honores.
 Mercurius certe quiddam conando super te
 Assultus movit, tua quos industria novit.
 Novit eos, inquam, bene nota proinde relinquam:
 Tantum subjuncta breviter michi sint duo puncta.
 100 Tu, pater, offendi potuisti, non reprehendi,
 Cum subito verbum revocavit Cesar acerbum,
 Jamque novum scisma non imposuit tibi crisma:
 Inmo, quo nolles caruisse, sub unguine polles.
 Gaudeat his donis sibi barba potens Aaronis,
 105 Gestans unguentum juxta psalmi documentum.
 Sub celi rore vivo pascatur odore,
 Qui fluit á capite celestis principe vite,
 In quo viva bona, de quo sunt optima dona.
 Hic liquor unguenti solus placet omnipotenti,
 110 Quem loquitur psalmus: quis hic est nisi spiritus almus?
 Nescit scismaticus gravis ista Sion inimicus,
 Expertes olei sunt ejusdem Pharisei,
 Qui sibi sunt montes Hermon, anathemate fontes.
 Tum ros Hermonis descendit in alta Sionis,
 115 Cum nova Christicolis micat alti gratia solis.
 Que sacramenta tegis, jam pares, littera legis.
 Nobis illa toga, quam gestavit Sinagoga,
 Debuit infundi karismate roris habundi,
 Sicut nosse vales, per barbas pontificales.
 120 Pontificis functus noster vice, maximus unctus,
 Dum capud excussit, barbam pinguescere jussit.
 Militat inde spei sacre sub dote fidei
 Per barbam vestis donis sibi predita festis,
 Unguine festivo, supreme pacis olivo.
 125 Exclamavisse verbo licet Ethiopisse,
 Que vi sermonis exhausta sui Salemonis,
 Miratur qui sit, cui nil sapientia desit.
 Ordo ministrorum, cultus, vultus puerorum,
 Gloria vasorum, lex ipsa ministeriorum,
 130 Edes, expense, fastus, convivium, mense,
 Templi structura, sacrorum mistica jura,